

1 | Kayamanan na Hindi Mawawala Kailanman

Dinadamayan n'yo ang mga kapatid na nakabilanggo. At kahit inagawan kayo ng mga ari-arian, tiniis n'yo ito nang may kagalakan dahil alam ninyong mayroon kayong mas mabuting kayamanan na hindi mawawala kailanman. MGA HEBREO 10:34

Ang isa sa mga tamang tugon sa pagsubok ay ang tanggapin sila nang may kagalakan habang nakatuon sa *mas mabuting kayamanan na hindi mawawala kailanman*. Noong panahong isinulat ang liham na ito, pinagnanakawan ang mga Kristiyano at hindi hinuhuli ang mga magnanakaw. Isa itong uri ng pang-aapi sa mga mananampalataya. Pinalakas ng sumulat ng Mga Hebreo ang loob nila sa pagsabing sa piling ng Diyos, mayroon silang kayamanan na hindi kailanman mananakaw sa kanila kahit pa mawala ang mga pag-aari nila dito sa lupa. Tayo rin ay maaaring magkaroon ng dakilang pananampalataya kahit pa mawala ang ating mga ari-arian dahil mayroon tayong kayaman kay Jesus. Ano ang isang bagay na kinailangan mong isuko dito sa lupa, dala ang kaalaman na mayroon kang gantimpala na hindi mawawala kailanman?

2 | Malaking Gantimpala

Kaya huwag kayong mawawalan ng pananalig sa Diyos, dahil may malaking gantimpalang nakalaan para sa inyo. MGA HEBREO 10:35

Ang sumulat ng Mga Hebreo ay naki-usap sa mga mananampalataya na huwag isuko ang kanilang pananampalataya at katiyakan sa Diyos. Ito ang tutulong sa kanila na makaahon sa mga panandaliang paghihirap sa mundo. Hiniling niya sa kanila na balikan ang dating pinagmumulan ng kasiguruduhan nila dahil ito ay may

malaking gantimpala. May panahon ba na nayanig ang tiwala mo sa mga pangako ng Diyos? Paano ka tumugon?

3 | Mas Mabuting Pangako

Kailangan ninyong magtiis para masunod n'yo ang kalooban ng Diyos, at matanggap n'yo ang ipinangako niya. MGA HEBREO 10:36

Sa pagpapatuloy niya ng liham, hinikayat ng manunulat ng Mga Hebreo ang mga mananampalataya na ituon ang kanilang pansin sa kinabukasan upang magawa nilang magtiis sa gitna ng mga pagsubok na kinakaharap nila. Nang mabuhay muli si Cristo, tinupad Niya ang Kasulatan. Ang pangako ng Diyos ay hindi natin pinaghihirapang matanggap. Bagkus, ito ay naghihintay na para sa atin. Sinasabi sa Bibliya na matatanggap natin ang ipinangako Niya matapos natin *magtiis para masunod ang kalooban ng Diyos*. Paano nakatulong ang mga plano at layunin ng Diyos na hikayatin kang ituon ang pananaw mo sa kinabukasan?

APPLICATION

- Nananalig at nananampalataya ka na ba sa Diyos na walang hanggan, ang ating dakilang gantimpala? Gusto mo bang manalangin upang manalig at umasa sa Kanya simula ngayon?
- Tama ba ang nagiging tugon mo sa mga pagsubok at paghihirap? Ano ang mga bagay na maaari mong gawin ngayong linggo upang tumugon nang may paniniwala at katiyakan sa Diyos?
- May kakilala ka ba na dumaranas ng pagsubok? Manalangin kasama nila upang palakasin ang kanilang pananampalataya.